

-इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. कठुआ जिले च होए दे टाकरे च सुरक्षाबलें 4 आतंकवादिएं गी मारी मकाया ऐ। कार्रवाई दौरान सुरक्षाबलें दे बी 4 जवान शहीद।
2. लेफ्टिनेंट गवर्नर मनोज सिन्हा ते मुखमंत्री उमर अब्दुल्ला होरें कठुआ टाकरे दौरान शहीद होए दे जम्मू-कश्मीर पुलस दे जवानें गी श्रद्धांजलि अर्पित कीती ऐ।
3. विदेश मंत्री डॉ. एस जयशंकर होरें आखेआ ऐ जे भारत पाकिस्तान दी कट्टरवाद आहली मानसिकता गी नेई बदली सकदा।
4. उपमुखमंत्री सुरिंद्र चौधरी होरें आखेआ ऐ जे केंद्र ते जम्मू-कश्मीर सरकार प्रदेश च स्थाई रमानदारी लेई किट्ठे रलियै कम्म करा'रदियां न।।
5. रियासी जिले दे जांगली इलाके च संदिग्ध नकलो हरकत बारे जानकारी थोने परैंत सुरक्षाबलें आसेआ उत्थे बड्डी सतह उप्पर तपाशी अभियान रम्भेआ गोआ ऐ।

<><><><><><>

Encounter

कठुआ जिले दे दूर-दरेडे जांगली इलाके च होए दे टाकरे च सुरक्षाबलें 4 आतंकवादिएं गी मारी-मुकाया ऐ जिसले के सुरक्षाबलें दे बी 4 जवान इस दरान शहीद होई गेन। आकाशवाणी दे जम्मू संवाददाता दी रिपोर्ट मूजब, टाकरे आहली थाहरा दे नेडे अज्ज ड्रोन दे राहें इक होर पुलसकर्मी दा शव दिक्खेआ गोआ। सुरक्षाबलें दा एह अभियान जैश-ए-मोहम्मद दे ओकड़े मुश्तबा आतंकवादिएं दे सफाए आस्तै रम्भेआ गोआ हा जिनें अंतरराष्ट्री बन्ना पार करियै इस बक्खी घुसपैठ कीती ही। ड्रोन दी मदाद कन्नै 4 आतंकवादिएं दे मारे जाने दी तस्दीक कीती गई ऐ। सुरक्षाबलें आसेआ शव बरामद करने ते कुसै बी बकाया राहंदे खतरे गी खत्म करने दे मकसद कन्नै अभियान अजें जारी रक्खेआ गोदा ऐ। उआं इस बारे होर ब्यौरे गी अजें बलगेआ जा'रदा ऐ।

<><><><><><>

LG/CM Tributes

लेफ्टिनेंट गवर्नर मनोज सिन्हा ते मुखमंत्री उमर अब्दुल्ला होरें अज्ज कठुआ जिले च होए दे टाकरे च शहीद होए दे पुलसकर्मियें गी श्रद्धांजलि भेंट कीती। एल.जी मनोज सिन्हा होरें जम्मू-कश्मीर पुलस दे शहीदें दी बहादुरी गी नमन करदे होई इंगी संवेदना प्रगट कीती। मुखमंत्री उमर अब्दुल्ला होरें शहीद पुलसकर्मियें दे बलिदान गी नमन

कीता। उनें शहीदें दे परिवारें आस्तै प्रार्थना करदे होई आखेआ जे हिम्मत ते बलिदान गी कर्दे बी भुलाया नेई जाई सकदा। उनें जख्मी सुरक्षाकर्मियें दे तौले गै नरोए जोने दी कामना बी कीती।

<><><><><><>

Rising-Star Tributes

भारती सेना दी राइजिंग स्टार कोर नै कठुआ च आतंकवाद रोधी अभियान दे दौरान बहादुरी कन्नै लड़दे होई सर्वोच्च बलिदान देने आहले जांबाज जम्मू-कश्मीर पुलस दे कर्मियें गी श्रद्धांजलि अर्पित कीती ऐ। इक्क सोशल मीडिया पोस्ट च कोर नै पुलसकर्मियें आसेआ प्रदर्शित हौंसले ते समर्पण गी सलाम कीता ते आखेआ जे उन्दे बलिदान गी म्हेशां चेता कीता जाग। आतंक दे खिलाफ लड़ाई च इनें जवानें दे बहादुरी आहले जल्न राश्ट्र दी सुरक्षा आस्तै उंदी अनन्युट प्रतिबद्धता गी दर्शादे न।

<><><><><><>

EAM-Pakistan

विदेश मंत्री डॉ. एस जयशंकर होरें अज्ज लोकसभा च बोलदे होई पाकिस्तान ते बंगलादेश च अल्पसंख्यकें पर हमलें दी सख्त निंदा कीती। उनें सदन गी दस्सेआ जे इस बरे फरवरी महीने पाकिस्तान च हिंदू समुदाय दे खिलाफ जुल्में ज्यादातिएं दे 10 मामले सामने आए न जिंदे च अगुवा करने ते जबरदस्ती धर्म बदलवाने दे मामले शामिल न। उनें दस्सेआ जे बांगलादेश च बरे 2024 च अल्पसंख्यकें पर हमलें कन्नै सरबन्धत 2 जहार 400 घटनां पेश आइयां ते 2025 च ऐसी घटनाएं दी गिनतरी अर्जे 72 ऐ। एह पुच्छे जाने पर जे क्या भारत एहदे पर कोई कार्रवाई करग तां जयशंकर होरें आखेआ जे भारत नै इनें मामलें पर नेइमी तक्क रक्खी दी ऐ ते इनेंगी भारत आसेआ आलमी सतह उप्पर पुट्टेआ जंदा ऐ।

<><><><><><>

PM-MKB

प्रधानमंत्री नरेन्द्र मोदी होर महीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर महीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह कल 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

Dy CM-Security

उपमुख्यमंत्री सुरिंद्र चौधरी होरें अज्ज आखेआ ऐ जे केंद्र ते जम्मू-कश्मीर दी सरकार प्रदेश च स्थाई रमानदारी यकीनी बनाने लेई किट्ठे रलियै कम्म करै करदियां न। उनें खिते च सुरक्षा बवस्था तगड़ी बनाने च दौनें सरकारें दे सांझे जत्नें पर लोऽ पाई। उनें आखेआ जे खिते दी तरक्की लेई रमानदारी ते स्थिरता अत लाजमी न ते दौनें गै प्रशासन, जम्मू-कश्मीर दे लोके लेई सुरक्षित माहौल कायम करने लेई बचनबद्ध न। उनें आखेआ।

<><><><><><>

Reasi-Search Operation

सुरक्षबलें संदिग्ध गतिविधि दी सूचना मूजब रियासी दे जांगली इलाके च बड़डे पैमाने पर तपाशी अभियान शुरू करी दिता ऐ। अज्जै थमां शुरू होए दे इस अभियान च कई इकाइयां खेतर दी सुरक्षा निश्चित करने आस्तै घने जांगली इलाके दी सावधानी कन्ने तपाशी करा करदियां न। अधिकारियें निगरानी तेज करी दिती ऐ ते कुसै बी संभावित खतरे दा पता लाने दी कोशिशें च तालमेल कन्ने जत्न कीते जा'रदे न। आसे-पासे दे बसनीके गी चौकन्ना रौहने ते नेइमें सुरक्षा कर्मियें जां अधिकारियें गी कुसै बी गैर साधारण गतिविधि दी सूचना देने दा आग्रह कीता गेआ ऐ। साहदे रियासी जिले दे संवाददाता देवेन्द्र ठाकुर नै इस बारे होर मती जानकारी दिंदे होई दस्सेआ।

<><><><><><>

Navratras-Security

औंदे नरातें दे घ्यार गी दिक्खदे होई श्री माता वैष्णो देवी जी दे आधार शिविर कटरा च सुरक्षा बंदोबस्तें गी होर बी निग्गर बनाया गेआ ऐ। जहारां बद्धे श्रद्धालु, मेद ऐ जे इस पवित्र मौके पर इत्थें दर्शन करने लेई आंगन। प्रशासन नै एहदे लेई लोइचदे इंतजाम कीते दे न। उधमपुर-रियासी रेंज दे डीआईजी रईस मोहम्मद भट्ट होरें भरोसा दोआया ऐ जे सुरक्षा दे सारे लोइचदे बंदोबस्त कीते गेदे न जेहदे च निगरानी, बाद्धू सुरक्षा बल ते हर औने जाने आली थाह पर निगरानी कीती जा'रदी ऐ तां जे श्रद्धालुएं गी कुसै बी चाल्ली दी परेशानी पेश नेई आवै।

<><><><><><>

Katra-Flowers

जियां-जियां नरातें दा त्यौहार कोल आ'रदा ऐ, उआं गै कटड़ा च इक्क मुकामी मुस्लिम परिवार अपने सब्भनें शा मता मुनाफा देने आहली अवधि आस्तै जोरें-शोरें नै तैयारी करारदा ऐ। समर्पित फुल्ल दी राई-बाई दे राहें इस परिवार नै सफलतापूर्वक अपने राई-बाई आहले उद्यम गी इक फलदे-फुल्लदे बपार च तब्दील करी दिता ऐ जेदे कन्ने उनें सलाना 10 लक्ख रपे कमाए न। नरातें दे दौरान बध्दी मंग दे कन्ने उन्दे बपार च महत्वपूर्ण बाद्दा होआ ऐ। हाल दे बरे च उनें शैल गुणवत्ता आहली पैदावार यकीनी बनांदे होई करसानी दी भलेआं नमीं तनीके गी अपनाया ऐ। साहदे संवाददाता कन्ने गल्लबात करदे होई करसान शौकत अली नै आखेआ।

<><><><><><>

Jummah-tul Wida

पवित्र रमजान महीने दे अखीरले शुक्रवारें यानि अज्ज जुमात उल विदा दे मौके पर जम्मू-कश्मीर च खरी मती गिनतरी च मुस्लिम समुदाय दे लोकें मकामी मसीतें च जाइयै विशेष प्रार्थना कीतियां। इस मौके पर लोकें शांति, खुशहाली ते एकता लेई दुआ मंगी। एह ध्याड़ा समुदाय गी सशक्त बनाने ते इक-दुए दी मदाद करने दे महत्व गी दर्शादा ऐ। इस सरबंध्य च जामियां मस्जिद डेवेलपमेंट कमेटी उधमपुर दे अध्यक्ष तनवीर शेख होरें साहड़े संवाददाता कन्नै खास गल्लबात करदे होई आखेआ।

तोआई, राजौरी दे डिप्टी कमिशनर अभिषेक शर्मा होरें जुमात उल विदा ते औंदे ईद दे ध्यार लेई कीते गेदे बंदोबस्तें दा जायजा लैता। उन्नै आखेआ।

<><><><><><>

PMAY-Udh.

ग्रामीण इलाकें च घरें-मकानें सरबंधी सुविधाएं च सुधार दी दिशा च इक महत्वपूर्ण गैह पुट्टदे होई ग्रामीण विकास विभाग आसेआ अज्ज उधमपुर दे डिप्टी कमिशनर हुंदे दफतरै च प्रधानमंत्री आवास योजना आवास प्लस दे दुए चरण बारै इक कार्जशाला ते जागरूकता कार्जक्रम दा सरिस्ता कीता गेआ। इस कार्जक्रम नै जिला अफसरें, पंचैती राज इदारें ते समुदायें दे सदस्यें गी इक्क सांझे मंच उप्पर आहनने ते इस महत्वपूर्ण योजना दे फायदें ते पात्रता बारै चर्चा करने दा मौका उपलब्ध करोआया। इत सरबंध्य च आकाशवाणी समाचार कन्नै गल्ल करदे होई असिस्टेंट कमिशनर डिवेलपमेंट रंजीत सिंह होरें आखेआ।